

FURBUTE, SINODÂL, CATOLICHE

Cjâr pre Antoni,

a son passaz za vinc' agns di cuanche tu eris capelan a Codroip e che tu nus menavis, noâtris mularie, a zujâ tai palûz e a rafrescjâsi i pîs ta l'aghe dal Cuâr.

In chê volte la nestre plêf a ere sot la bachete orchestrâl di bons. Ganis. Il nestri cûr al ere par pre Pitin, pal so mût di vivi e di fâ il predi, pe vite martare ch'al veve vût lui "predi di serie B"; come che tu às vût scrit tun librut ch'al è une des pagjnis plui conplenis de leteradure furlane.

Po tu às stralozât par Val e Rualp e al è passât tant timp.

Tornant a viodisi e peteçant dal gjaul e di sô mari, e ài pensât che la tô idee di "Glesie Furlane" a ere un tic fûr dal timp e che il to revoc dal Patriarcjât al ere fûr di mode.

Come che tu tu mi davis dal sociologjst e tu pensavis che "Lettere Friulane" a vivevin di post-moderno cjariât. Dut chest però cun rispiet, sinpatie e afiet.

Ultimamentri si sin cjatâz insieme a 130 cristians e o vin dade la nestre adesion a di un document su la legjtimîtât dal pluralisin tes sieltis pulitichis dai cristians. O ài viodût che no tu às dit di sî par proforme, ma cunvint, e o ài vût tant gust.

Di chest câs, dôs robis no rivi a parâlis jù e mi àn fat restâ malapajât, e ti domandi un to parê:

1) O ài capît che il tiermin "pluralisin" al è une des peraulis plui balarinis, e partant inutilis, tant dal vocabolari politic che religjôs. O ài decidût di doprâlu mancul ch'al è pussibil. Ma crodistu ancje tu, come cualchidun, che il pluralisin dai cristians nol puedi scjavalgjâ i cunfins biblics dal pentapartît?

2) Il document dai 130 cristians furlans lu à publicât il "Piccolo" di Triest la vee de vee des votazione; dut e cun dutis lis firmis. La di prin lu veve metût il "Messaggero Veneto" te rubriche des "letaris"; cun tun struc di chêi ch'a vevin firmât. La "Vite Catoliche" dute infogade te batae furlaniste di Corgnali, no à rivât a cjatâ un cjantonut par nô, e chest tun moment "fuart" e "rivoluzionari" come chel de Sinode, là che une glesie e vares di spalancâ puartis e barcons par ch'al jentri il Spîrt cu la so novitât e libertât.

Ti sintistu di dâur ai tiei letôrs une classifiche dai gjornâi di chenti daûr dal criteri di fedeltât al popul furlan e 'es domandis che chest popul j fâs 'e sô glesie?

Mandi.

Mario Banelli

O volares podê tornâ a cjaminâ insieme traviers i palûz dal mont e a ristorâsi a di chê "fontane dal borc" (Zuan XXIII) che jè la glesie.

Il mâl al scomence cuanche l'istituzion umane e scjafoe la realtât mistiche e si ûl doprâ peraulis e stanps umans par dâj une forme al misteri. E nas la confusion e il scandul.

Cjapin la peraule “libertât”. La glesie, cuanche e jè tibiade, le pratint in non de veretât che à intorsi. Ma, apene liberade, ur e dinee a di cheâtris, parceche l’erôr nol à diriz. Par chel no stà lâ a domandâj ‘e glesie catoliche ce ch’a vuelin dî “libertât” e “pluralisin”. Chel ch’al à la veretât, al è tentât di diventâ intolerant parceche, se lui nol sbalgje mai, a scuegnin par fuarce sgarâ cheâtris. Che àn di ubidî e di tasê.

Cussì il “pluralisin”, che par nô al ûl dî cjalâ la stesse robe di plui bandis par cjatâ une soluzion che pò sei plui indenant, pe glesie catoliche al ûl dî dome ripeti in duc’ la stesse robe. I côros a son une robe de Riforme; nô o sin plui te monodie.

La glesie locâl, che vares di jessi la vere incjarnazion di Crist tun moment storic e tun tassel gjeografic, e devente la nône che à dutis lis pecjs de nône e inpen di jessi nestre mari (parvie che nus fâs) e nestre fie (parvie che le fasìn), e devente madrigne, cracule e prepotent.

E cumò vignìn ‘e Vite Catoliche, espression cualificade de nestre glesie locâl.

E jè une cuistion di diretôr, di gjornâl e di istituzion.

Pal diretôr nond’è fastidis. Corgnali al è un onp inteligjent, navigât, ch’al à rivât a sfrancjâsi di chê innomine di furlanist che podeve puartâj prejudissi.

Cumò al à une vision plui globâl e distacade des robis, ch’j permet di dâ un judissi sigûr e catolic. Al à dut dîr di fâsi une strade, co al à pajât il bilgjet. E j augurìn buine furtune.

Il gjornâl, che par nô al è discjadût un disordin, par lôr al è lât indenant. La cuintripove le àn tal librut butât fûr pai siei 60 agns di vite.

Ancje se no son staz interpelâz i “nuovi poveri”, i pulitics le àn laudade e la publicitât e jè rivade a 140 milions. Ancje se la part furlane, no par colpe di chêi ch’a scrivin, no jè mai stade cussì malsestade come cumò. Ma chest nol à inpuartance tune vision globâl, catoliche, sinodâl.

E o sin rivâz ‘e ultime “novità”. Sint la Vite Catoliche la vôs dal paron (ti visistu chê cjase discografiche cul cjan?), e a di vuacâ daûr comant. E cumò si fevele dut in “sinodese”. Une robe che nissun no le capis, che duc’ a bruntulin, che duc’ le sglonfin, che nissun nol à il coragjo di dî che no va e ch’a scuegnin salvâle par no diclarâ faliment. E alore si fevele di ajar di Pentecostis e di aveniment straordenari, ancje se si sa benissin che i furlans no vuelin savênt e che si sbonbin di une robe cussì foreste. Si à l’impression che i prins a no crodi te robe a setin propit lôr, che ti van indenant a son di slogans e che ti mandin fûr il cuadernut dai conpiz come pai fruz di asilo par ch’o diventìn “adulti nella fede”. Tant plui che i furlans e àn dîr di cressi tune fede che veti il savôr de lôr tiere.

In chest contest di no-clarece, di no-coragjo, di no-sielte (ma sotvie si sta sinpri de bande dal podê), a saltin fûr chêi scandui lì, che un Messaggero al bati la Vite Catoliche tune iniziative che vares vût di cualificâ une glesie taramotade de Sinode. A son i prins risultât dal gnûf clericalisin sinodâl, ch’al à il so spieli setemanâl te Vite Catoliche, che à come diretôr chel “dc” ch’al è diventât il consulent spirituâl de DC.

A di chest pont, no stà domandâmi classificjis.

Mai 1985

Antoni Beline